

四庫全書

史部

欽定四庫全書

蜀中廣記卷四十九

明 曹學佺 撰

宦游記第三

川東

後漢

吳資字元約泰山人永建中巴郡太守有惠政郡境連
歲豐穰百姓歌之曰習習晨風動澍雨潤乎苗我后卹

時務我民以優饒及遷去又爲之歌曰望遠忽不見惆
悵嘗儻個思遠實難忘悠悠心永懷

但望字伯闔泰山人初爲并州刺史桓帝永興二年來
守巴郡郡境廣遠給吏兼將人從冬徃夏還憂喪吉凶
不得相見加以水陸俱艱山多猛獸迫於期會隕身江
河投死虎口但察知之上疏極陳民瘼欲分巴爲二一
治臨江一治安漢事格不行及劉璋分巴郡爲三其議
本此百姓賴之

朱辰字元燕蜀郡廣都人巴郡太守甚著德惠卒於官
郡獍民北送及墓獍蛋鼓刀擗踊感動路人於是葬所
草木成頃餘皆倣之曲折

晉

羅獻襄陽人後主時爲巴東郡太守蜀平仍其官加拜
凌江將軍領武陵太守泰始二年吳大將步闡唐咨侵
巴東獻保城拒之不能入乃西侵至朐忍獻出擊闡大
破之朐忍得全步唐乃退遷監軍假節安南將軍封西

鄂侯入朝加錫御蓋朝服

五代

李遷哲字孝彥安康人周文帝時授侍中驃騎大將軍
除直州刺史與田宏同討信州時信州爲蠻酋向五子
王等所圍宏遣遷哲赴援比至信州已陷五子王等聞
遷哲至狼狽奔走遷哲入據白帝追五子王等破之及
田宏還軍文帝令遷哲留鎮白帝信州先無倉儲軍糧
匱乏遷哲乃收葛根造粉兼米以給之遷哲亦自取供

食時有異膳即分賜兵士兵士有疾患親爲醫藥以此
軍中感之人思効命黔陽蠻田烏度田烏唐等每抄掠
江中爲百姓患遷哲隨機出討殺獲甚多由是諸蠻畏
威各送糧餼遣子弟入質者千有餘家遷哲乃於白帝
城外築城以處之并置四鎮以靜峽路自此寇抄頗息
民獲寧宇

唐

長孫無忌字輔機河南洛陽人顯慶四年以忤楊國忠

安置黔州逼令自縊而死至今有戍守其墓

李祠客廣武人貞觀中爲渝州刺史誠信廉介民懷其惠罷政之日家無餘財

唐次并州晉陽人貞元間以禮部員外郎貶開州刺史久滯蠻荒孤心抑鬱乃採自古忠臣賢士罹讒放逐遂致殺身而君猶不悟者著書三篇謂之辯謗畧上之德宗愈怒謂左右曰唐次乃方吾爲古昏君遂改次夔州刺史憲宗即位乃召還

劉禹錫字夢得中山人爲夔州刺史上言民情利害及本州公務二表極中時宜

李吉甫字宏憲趙郡人初以中書侍郎爲陸贄所疑出知明州及贄貶忠州時宰欲殺之起吉甫爲忠州刺史使甘心焉吉甫並不以前事介意與之驩若平生時論以吉甫爲長者

劉晏字士安曹州人初與楊炎不相得及炎入相貶晏忠州刺史炎欲誣構晏罪知庾準與晏有隙舉爲荊南

節度以伺晏動靜準乃奏晏與朱泚書祈其救解言多
怨望炎又證成其事誅之天下莫不稱冤

陸贄字敬輿嘉興人爲裴延齡所讒貶忠州別駕既放
荒遠常閩戶人不識其面政惟簡靜士民懷服又避謗
不敢著書但集今古經驗藥方五十卷帝後稍思之以
薛延爲忠州刺史諭旨慰勞順宗立召還會卒年五十
六諡曰宣

栢貞節大厯中鎮夔門按唐文苑英華有授栢貞節制

其畧曰栢貞節雅有氣幹深於戎律蘊三畧以經武秉
一心而事君可使持節都督夔州諸軍事充夔忠萬歸
涪等州防禦使兼御史中丞杜甫詩曰栢公鎮夔門滯
霧茲一掃

李草忠州臨江令時有中官被旨奉御容還闕乃挈西
州一妓而下所在肆橫毆吏取庸草徑入舟取妓縛岸
上草奏將劾之其人怖懼遜謝遂不敢爲害

白居易字樂天太原人元和十三年冬由江州司馬量

移忠州刺史郡居峽中稱險陋樂天以簡靜爲政風流
暇豫郡人樂道之其遊賞遺跡若東坡東澗鳴玉溪諸
勝至今存

韋處厚字德載京兆人元和中爲考功員外郎時宰相
韋貫之以議兵不合旨出官處厚坐與貫之善出爲開
州刺史有盛山詩集名流屬和韓退之序之楊端太原
人乾符中南詔陷播州端應募領兵復播州授安撫使
諭以威德縻以恩信蠻人懷服子孫世襲宋開禧中贈

太師

宋

卞震成都人工詩舉蜀進士爲渝州判官入宋仍其舊
職會賊杜承褒攻圍州城厚賄誘震震斬其使與刺史
分部士卒夾攻之賊遂平

秦傳序江寧人淳化五年充夔峽巡檢使李順之亂城
中乏食傳序出囊橐服玩盡市酒肉以犒士卒慰勉之
城壞傳序赴火死其家寄荆湖間子真溯峽求父屍溺

死奏至太宗嗟惻錄其次子賜錢十萬

單煦平原人初知洛陽縣轉知昌州時詔城蜀煦以蜀負山帶水一旦毀籬垣而興版築其費鉅萬非民力所堪請但築土城轉運使即移檄諸郡悉如其議後徙清平軍擢御史左遷知濮合二州合居涪漢間夏秋患水涇煦築東堤禦之累官光祿卿

唐介字子方江陵人擢第調奉節令有政聲召試御史衷行

周執羔字表卿弋陽人歷官知夔州兼安撫使時秦播
蠻叛執羔責豪帥曰朝廷任爾爲長一方騷動責將誰
歸豪懼擊斬叛首以獻夷患遂息

周雍永康人知達州講學訓士儲粟惠民有社倉說約
法一十八條鄉社法四條民甚便之後以事忤上恬然
引去

丁謂字謂之更字公言長洲人夔州路轉運使蠻地饒
粟常乏鹽謂聽以粟易鹽蠻人大悅由是屯兵之州不

須轉餉清江諸砦皆可給足特遷秩賜金

李承約黔南節度使以恩信撫夷落勸農桑興學校及當代黔南人詣京師乞留懇至詔許留二年

程頤字正叔顥之弟紹聖追貶元祐諸臣頤坐竄涪州北山有洞讀易其中至今崇祀

程師孟字公闢吳人舉進士提點夔路刑獄夔部無常平粟建請置倉迫凶歲賑民不足即矯發他儲不俟報吏懼白不可師孟曰必俟報餓盡爲殍矣竟發之

楊旬夔紹聖中任夔州推官處心正直積累陰功有子
當入試夢神告旬曰汝陰隲有感汝子必貴若應科舉
可改名楊椿旬覺如其言果中第六名

王夢璽雲南人任達州學正出入道誼不愧師模嘗權
州縣事苦節自持卒之日無以爲斂士林惜之

石恕衡州人靖康中爲總潼關夔路兵馬攝南平軍事
聞二帝北狩率勤王兵徑抵南京高宗立以軍事任之
恕凡三守茲土甚得民心

周敦頤字茂叔道州營道人歷合州判官部使者趙抃
惑於讒言臨之甚威敦頤處之超然通判虔州抃守虔
孰視其所爲乃大悟執其手曰吾幾失君矣今而後乃
知周茂叔也

查籥字元章隆興初以御史出爲夔路運判調停輸運
之法務以便民爲事措實摠折以寬民力蠲一路積賦
十餘萬緡後轉成都運使

王十朋字龜齡樂清人乾道元年知夔州時夔苦於馬

綱十朋兩上狀請罷之歲旱爲文禱於廟不踰時雨大降其誨士以忠孝與思無邪爲主民輸租者使自概量去之日士民攀轅不忍舍

李浩字德遠臨川人以秘閣修撰知夔官兼夔路安撫使奉法循理律已甚嚴時施川蠻酋起兵相攻夔民大恐浩草檄諭化之邊境又安踰年以疾卒於官

屈堅忠州防禦使建炎初金人圍陝府堅引兵救之圍解金人執堅堅曰吾來爲解圍也城苟全吾死何憾叱

金人使遠殺之

余玠字義夫蘄州人以功累官兵部侍郎四川安撫制
置使兼知重慶府四川總領四川轉運使玠大更前人
敝政遴選守宰築招賢之館於府之左供帳一如帥所
居下令曰集衆思廣忠益諸葛孔明所以用蜀也豪傑
之士趨期立事今其時矣播州冉氏兄弟璉璞有文武
才隱居蠻中前後閫帥辟召堅不起聞玠賢詣府上謁
刺入玠即出見與分廷抗禮賓館之奉冉居之若素有

居數月請見曰某兄弟辱明公禮遇思有以少裨益爲
今日西蜀之計其在徙合州城乎蜀口形勝之地莫若
釣魚山請徙諸此若任得其人積粟以守之賢於十萬
師遠矣巴蜀不足守也玠大喜曰吾固疑先生非淺士
先生之謀玠不敢掠以歸已遂不謀諸衆密聞于朝請
不次官之詔以璫爲承事郎權發遣合州璞爲承務郎
權通判州事徙城之事悉以任之卒築青居大獲釣魚
雲頂天生凡十餘城皆因山爲壘碁布里分爲諸郡治

所屯兵聚糧爲必守計且誅潰將以肅軍令又開屯田於成都蜀以富實十年冬玠率諸將巡邊直搗興元兵大戰十三年又大戰于嘉定初利司都統王夔素殘悍號王夜叉恃功驕恣桀驁不受節度朝廷雖知其不法在遠不能詰也大帥處分少不嫌其意則百計撓之使不得有所爲玠夜召夔計事潛以楊成代領其衆夔至斬之戎帥欲舉統制姚世安爲代玠素欲革軍中舉代之弊遣都統金某往代世安世安閉關不納因結丞相

謝方叔讒玠於帝玠鬱鬱不樂寶祐初聞召命愈不自安一夕暴下卒蜀人悲慕如失父母

張珏字君玉隴西人年十八從軍以戰功累官四川制置副使知重慶府五月加檢校少保徵其兵入衛蜀道斷不得達而瀘敘長寧富順開巴渠諸郡不一月皆降元元合兵圍重慶援絕糧盡珏屢以死士間入城許以赴援且爲之畫守禦計二年正月遣其將趙安龍裴青居執安撫劉才參議馬嵩歸二月遣張萬以巨艦載精兵

斷內水橋入重慶四月合重慶兵出攻鳳頂諸砦珏結
瀘士劉霖先坤朋爲內應六月遣趙安破神臂門執梅
應春殺之復瀘州重慶兵漸解去圍瀘州十二月趙定
應迎珏入重慶爲制置瀘州圍經年食盡安撫王世昌
自經死元兵會重慶駐佛圖關招降珏不從元兵破咸
淳皇華城軍使包深巷戰死既而元兵破紹慶府珏率
兵出薰風門與元將伊蘇岱爾戰扶桑壩珏兵大潰城
中糧盡趙安以書說珏降不聽安乃與帳下韓忠顯夜

開鎮西門降珏率兵巷戰不支歸索鵠飲左右匿鵠乃
以小舟載妻子東走涪中道大憾斧其舟欲自沈舟人
奪斧擲江中珏踊躍欲赴水家人挽持不得死明日萬
戶特穆爾追及於涪執之重慶降制機曹琦自經死珏
至安西趙老庵其友諭以盡節亦自經死琦蜀進士也
有趙立者字德修亦蜀人第進士以上書迂賈似道被
謫德祐初起爲大社令湖北提刑使蜀趣諸將入衛至
重慶則咎萬壽已降珏方城守爲後圖立無以復命還

至涪沈水死時制幕趙酉泰亦自殺

孟珙字璞玉棗陽人元大將塔爾海圖薩帥師入蜀號八十萬珙遣張舉提兵間道抵均州防遏元兵度萬州湖灘施夔震動珙兄璟時爲湖北安撫副使知峽州急以書謀備禦珙請于督府帥師西上璟調金鐸一軍迎拒于歸州大垓砦劉義捷于巴東縣之清平村珙弟璋選精兵二千駐澧州防施黔路四年進封子諤知元兵於襄樊隨信陽招集軍民布種積船材於鄧之順陽乃

遣張漢英出隨任義出信陽焦進出襄分路撓其勢遣
王堅潛兵燒所積船材又度師必因糧於蔡遣張德劉
整分兵入蔡火其積聚制拜寧武軍節度使四川宣撫
使兼知夔州招集沿邊經戰之士號寧武軍令璋領之
進封漢東郡侯兼京湖安撫制置使回鶻阿里巴圖爾
帥壯士老稚人馬來降剏飛鶻軍改阿里名父忠孝充
總轄乞補以官黎守閭師古言大理國請道黎雅入貢
珙報大理自通邕廣不宜取道川蜀卻之兼夔路制置

大使兼屯田大使軍無宿儲珙大興屯田上屯田始末
與所減募食之數降詔獎諭淳祐二年淮東受兵樞密
俾珙應援遣李得帥精兵四千赴之元兵至三川珙下
令應出戍主兵官不許失棄寸土權開州梁棟乏糧請
還司珙曰是棄城也棟至夔州使高達斬其首以徇由
是諸將稟令惟謹元兵至瀘珙命重慶分司發兵應援
遣張祥屯涪州拜檢校少保進封漢東郡公余玠宣諭
四川道過珙珙以重慶積粟少餉屯田米十萬石遣晉

德帥師六千援蜀珙奏襄蜀蕩析士無所歸蜀士聚於
公安襄士聚於郢渚臣作公安南陽兩書院隸以沒入
田廬俾有所教養請帝題榜以賜之

王仙者蜀都統也守涪州北兵攻圍無虛日勢孤援絕
宋既亡之二年城始破仙自刎斷其吭不殊以兩手自
摘其首墜地乃死

蜀中廣記卷四十九

欽定四庫全書

蜀中廣記卷五十

明 曹學佺 撰

宦游記第四

川北道屬

東漢

臧宮潁川潁人也將兵至中盧屯駱越是時公孫述將
田戎任滿與征南大將軍岑彭相拒於荊門彭等戰數

不利越人謀畔從蜀宮兵少力不能制會屬縣送委輸車數百乘至宮夜使鋸斷城門限令車聲回轉出入至旦越人候伺者聞車聲不絕而門限斷相告以漢兵大至其渠帥乃奉牛酒以勞軍營宮陳兵大會擊牛醢酒饗賜慰納之宮與岑彭等破荊門別至垂鵲山通道出秭歸至江州岑彭下巴郡使宮將降卒五萬從涪水上平曲公孫述將延岑盛兵於沅水時宮衆多食少轉輸不至而降者皆欲散畔郡邑復更保聚觀望成敗宮欲

引還恐爲所反會帝遣謁者將兵詣岑彭有馬七百匹
宮矯制取以自益晨夜進兵多張旗幟登山鼓噪右步
左騎挾船而引呼聲動山谷岑不意漢兵卒至登山望
之大震恐宮因從擊大破之斬首溺死者萬餘人水爲
之濁流延岑奔成都其衆悉降盡獲其兵馬珍寶降者
以十萬數軍至平陽鄉蜀將王元舉衆降進拔縣竹破
涪城斬公孫述弟恢復攻拔繁郾與吳漢並滅公孫述
帝以蜀新定拜宮爲廣漢太守

三國

張飛字益德涿郡人先主定蜀以飛領巴西太守曹操破張魯留夏侯淵張郃守漢川郃別督諸軍下巴西欲徙其民於漢中進軍宕渠蒙頭盪石與飛相拒五十餘日飛率精卒萬餘人從他道邀郃軍交戰山道迤狹前後不得相救飛遂破郃郃棄馬緣山獨與麾下十餘人從間道退引軍還南鄭巴土獲安先主爲漢中王拜飛爲右將軍假節章武元年遷車騎將軍領司隸校尉進

封西鄉侯先主伐吳飛當率兵萬人自閬中會江州臨發其帳下將張達范疆殺飛持其首順流而奔孫權追諡飛曰桓侯

霍峻字仲邈南郡枝江人先主以峻爲中郎將先主自葭萌南還襲劉璋留峻守葭萌城張魯遣將楊帛誘峻求共守城峻曰小人頭可得城不可得帛乃退去後璋將扶禁向存等帥萬餘人由閬水上攻圍峻且一年不能下峻城中兵纔數百人伺其怠隙選精銳大破之即

斬存首先主定蜀嘉峻之功乃分廣漢爲梓潼郡以峻爲梓潼太守裨將軍在官三年年四十卒還葬成都

六朝

柳儉字道約河東解人也隋文帝受禪擢拜水部侍郎封率道縣伯未幾出爲廣漢太守甚有能名俄而郡廢時帝勵精思政妙簡良能出爲牧宰儉以仁明著稱擢拜蓬州刺史獄訟者庭決遣之佐吏從容而已獄無繫囚蜀王秀時鎮益州列上其事遷邛州刺守在職十餘

年人夷悅服蜀王秀之得罪也儉坐與交通免職及還鄉妻子衣食不贍見者咸嘆伏焉

魯廣達陳巴州刺史太康初與儀同章昭達入峽口招定安蜀等諸州鎮時周將圖江左大造舟艦於蜀并運糧青泥廣達與錢道戢等掩襲縱火焚之仍還本轄廣達爲政簡要推誠任下吏人稱便秩滿皆詣闕表請乞留於是詔留二年

董叔開皇四年爲鹽亭令勤課農桑首建學校德政著

聞公餘遊鳳凰山後人思之號爲董叔山

豆盧勣字定東大象二年拜利州總管時王謙作亂勣嬰城固守謙遣其將達奚基等衆十萬攻之起土山鑿城爲七十穴堰江水以灌之勣時戰士不過二千晝夜相拒經四旬勢漸迫勣于是出奇兵擊之斬數千級降二千餘人梁睿軍且至賊因而解去

唐

顏真卿字清臣瑯琊臨沂人李輔國惡之奏貶蓬州長

史

郭元振魏州貴鄉人舉進士授通泉尉任使使氣不屑
細務則天聞其名乃召與語甚奇之充使聘於吐蕃
李元嬰封滕王與魯王靈夔相繼爲閬州刺史務行寬
大民甚懷之

顏杲卿瑯琊臨沂人天寶初任遂州司法參軍賦性剛
直泣事明濟後陞常山太守

崔渙以尚書司門員外郎忤楊國忠出爲劍州刺史天

寶十五載玄宗幸蜀渙迎謁於路抗詞忠懇皆究理體
玄宗嘉之以爲得渙晚宰臣房琯又薦之即日拜黃門
侍郎同中書門下平章事扈從成都府

馮宿字拱之東陽人貞元中舉進士歷學士侍郎擢東
川節度使完城郭增兵械十餘萬涪水數壞民廬舍宿
修利防庸一方便賴疾革將斷重刑家人請宥之宿曰
修短天也撓法以求宥吾不敢卒贈吏部尚書謚曰愨

元稹字微之河南人也以監察御史奉使東蜀劾奏故

劍南東川節度使嚴勵在州日沒入平人資產八十餘家詔徵其贓復歸於民執政不悅以他事貶鎮江陵府士曹參軍又十年量移通州司馬

史謙恕果州刺史百姓歌之曰使君來何晚昔日無儲令有飯

沈長源吳興初爲利州牧人安俗阜歐陽詹作益昌行曰驅馬至益昌倍驚風俗和耕夫隴上行負戴途中歌

何易于嘗爲益昌令刺史崔朴嘗乘春自上游多從賓

客歌酒泛舟東下直出益昌至則索民挽舟易于躬自
腰笏引舟上下刺史驚問狀易于曰方春百姓不耕即
蠶隙不可奪易于爲屬令當其無事可以充役刺史與
賓客跳出舟偕騎還去益昌民多即山樹茶利私自入
會鹽鐵官奏重權筦詔下所在不得爲百姓匿易于視
詔曰益昌不征茶百姓尚不可活矧厚其賦以毒民乎
命吏剡去吏爭曰天子詔所在不得爲百姓匿今剡去
罪愈重吏止死明府公寧免竄海裔耶易于曰吾寧愛

一身以毒一邑民乎亦不使罪蔓爾曹即自縱火焚之
觀察使聞其狀以易于挺身爲民卒不加劾邑民死喪
子弱業破不能具葬者易于出俸錢使吏爲辦百姓入
常賦有垂白僂杖者易于必召坐與食問政得失庭有
競民易于皆親自與語爲指白枉直罪小者勸大者杖
悉立遣之不以付吏治益昌三年獄無繫民民不知役
盧宏宣元和中累官刑部侍郎拜劍南東川節度使時
歲饑盜起酋豪自王僞署官吏發廩倉招亡命連蓬諸

州蠻落搖亂宏宣下檄招諭賊黨稍平簡其桀黠者署軍中孱弱無能者還之農首豪逃峽中令吏捕誅之

薛逢字陶臣河東人爲巴州刺史既而同年進士楊牧作相逢有詩云須知金印朝天客同是沙隄避路人威鳳偶時皆瑞聖潛龍無水謾通神收聞大銜之又出爲蓬州刺史

柳仲郢字諭蒙大中年爲梓州刺史劔南東川節度使時有孔目吏邊章簡者以貨交近倖前後廉使無如之

何仲郢因事決殺部內肅然不俟行法而自理在鎮五年美績流聞

路岩字魯瞻陽平寇氏人咸通中劔南東川節度使時蠻盜寇邊岩力爲拊循置定邊軍於邛州扼大渡河由是西山八國來朝

顏彥暉東川節度使賊來攻城援絕城陷彥暉不屈自殺妻子乃自刎諸將皆自殺

高仁厚始爲西川押衙以討蜀盜阡能等有功進都招

討指揮使東川楊師立反命仁厚討之賊夜掩諸營皆走仁厚大開營門設燭自帥兵伏道左右賊至見門開不敢入還去伏發擊之大敗追至城下圍之諸營皆走當死者衆仁厚乃召孔目張韶諭之曰汝速遣人分道追去者自以汝意諭之曰僕射幸不知宜速歸來可保其如常無憂也韶素長者衆信之皆還惟副使楊茂言走遠又爲欺罔乃斬以徇進圍梓州久不下仁厚乃射書城中曰不忍玉石俱焚爲諸君緩師十日至日四面

俱進破城必矣諸君圖之於是將士遂斬師立出降授
東川節度使

宋

馮瓚字禮臣歷城人乾德三年爲樞密直學士時劍外
初平命瓚知梓州無何蜀軍拔上官進率亡命三千餘
人掠民數萬夜攻州城瓚曰賊乘夜奄至此烏合之衆
以筆挺相擊必無固志正可持重以鎮之旦自潰矣密
令促其更籌五鼓賊悉遁去因縱兵追之擒斬上官進

陳升卿字光祖跨鰲人乾道中以御史出知劔州恤民
隱修學校士民咸悅太守閻伯永即學宮之傍立祠祀
之

張雍德州人西川轉運使知梓州蜀州青城民王小波
李順作亂衆至萬人雍訓練士卒募強勇守城輦綿州
金帛以實帑藏督僚佐陳世卿等治戎器伐木爲竿銷
鐘爲鎗紐布爲索賊設梯衝火車攻城急發機石碎之
火箭雜下賊稍退復治攻具城西北隅雍給曰軍士趣

治裝吾將開東門擊賊陽遣步騎五百臨東門賊升牛頭山瞰城內信然伏精兵萬餘山之東隅以待雍即召敢死士百輩縋而下盡焚其攻具自午達申殆盡賊以爲神凶黨數乘城進戰皆不利一日北風晝晦賊乘風縱火急攻北門雍與盧斌等領兵據門立矢石間固守不動賊爲之少却長圍八十餘日會援兵至賊始潰去事聞手詔褒美焉

王旦字子明大名人端拱間知蓬州清節著聞民被其

澤後官至平章事卒諡文正

龔鼎臣字輔之須城人知渠州事渠故僻陋無學者鼎臣建廟學選俊秀爲生徒日授講說立課嚴教自後始有登科者郡人繪像祀之

張仕遜字順之陰城人進士令射洪以寬厚得民嘗禱雨使君祠須臾大雨仕遜立庭中雨足乃去後轉運使檄移治郵民遮馬首不得去因聽還射洪安撫使至梓州問屬吏能否張雍曰射洪令第一累官同中書門下

平章事

朱勇梓州統制時與金人戰於瓦亭寨被執臨死罵不絕口後人立廟祀之賜名忠節

劉子羽字彥修崇安人金人窺蜀吳玠以經畧使戍河池王彥以鎮撫使戍金州二鎮皆饑興元帥臣閉糴二鎮病之皆願得子羽守漢中張浚乃承制拜子羽利州路經畧使兼知興元子羽至漢中通商輸粟二鎮遂安除寶文閣直學士是冬金人犯金州王彥失守退保石

泉子羽急移兵守饒風嶺馳告玠玠大驚即越境而東
一日夜馳三百里至饒風列營拒守金人仰攻死傷山
集募死士由間道自柵溪關入繞出玠後玠遽邀子羽
去子羽不可而留玠固守玠難之遂西子羽焚興元退
守三泉縣兵不滿三百取草芽木甲以食遺玠書訣別
玠時在僊人關愛將楊政大呼軍門曰節使不可負劉
待制不然政亦舍節使去矣玠乃間道會子羽子羽留
玠共守三泉玠曰關外蜀之門戶不可輕棄復往守僊

人闔以潭毒山形斗拔其上寬平有水乃築壁壘十六
日而成金人已至距營十數里子羽據胡床坐于壘口
諸將泣曰此非待制坐處子羽曰子羽今日死于此敵
尋亦引去自金人入梁洋四蜀復大震張浚欲移潼川
子羽遺浚書言已在此金人必不南浚乃止薩里罕由
斜谷北去子羽謀邀之于武休不及既回鳳翔遣十人
持書旗招子羽子羽盡斬之而縱其一還曰爲我語彼
欲來即來吾有死爾何可招也先是子羽預徙梁洋之

積至是金人深入餽餉不繼又腹背爲子羽及玠所攻死傷十五六疫癘且作亟遁去子羽出師掩擊墮溪澗死者不可勝計餘不能自拔者皆降

邵伯溫字子文河南人除知果州擢提點成都路刑獄蜀人德之再除利路轉運副使提舉太平觀初伯溫以父雍言世將亂惟蜀可居遂攜家入蜀免于靖康之難紹興四年卒

趙士埤紹興中知遂寧府江水汎漲瀕江隄決士埤率

士民塞之索胡床坐隄上左右請避不許須臾水落隄幸不壞時人以比王尊

李樗知巴渠時有虎白晝入城樗爲文榜諸社廟越五日虎斃于郊

陳咸字逢儒登進士第歷利路轉運判官開禧三年吳曦叛關外四州繼没人情大駭咸留大安軍督軍糧檄守楊震仲賑流民備姦盜衆稍安曦謂咸名士欲脇之以令其餘初咸語人曰咸受國厚恩義當擊敵恨無兵

權獨有下策削髮以全臣節會曦以書招之急咸答書
勸其稟命既而欲親諭之遂行遇僞統領孟可道知曦
已僭亂曰吾書不可用矣還至后鋤入帳中以刀自斷
其結披緇而出敵兵拘咸于岸曦聞怒甚安丙力爲救
解乃得釋歸

蜀中廣記卷五十

欽定四庫全書

蜀中廣記卷五十一

明 曹學佺 撰

蜀郡縣古今通釋第一

四川布政司

說文川者穿也水穿地而流曰川桑欽水經云大江出蜀是矣唐分劔南道為東西二川宋析為益梓利夔四路元為四川行省國朝因之為四川布政司 或稱三

川者非三川伊洛之地司馬錯勸秦伐蜀曰周自知失
九鼎韓自知亡三川是也漢武帝元鼎年以蜀郡廣漢
犍為為三蜀獻帝建安年分巴東巴西永寧郡為三巴
巴蜀雖別猶可槩稱

川西道屬

成都府

管六州二十五縣

帝王世紀云周太王從梁山止於岐下一年成邑二年
成都蜀本梁州之域毛詩奕奕梁山惟禹甸之尋江源

記云梁山首跨劍閣而尾入江矣故秦置縣曰成都

人皇之世九圍而蜀圍居其一黃帝之子昌意娶蜀山氏女生帝嚳封其支庶於蜀始為蜀國爾雅釋山蜀者獨也言不與他相連屬也漢武帝置益州益者阨也以其地險阨而益廣也唐玄宗西幸始改成都府陞號南京以地當長安之南矣其時長史實稱尹而知府則起於王蜀武成云 昔者州郡之分猶今之道府也州曰庸部郡曰導江則在王莽時州曰司隸郡曰成都則在

公孫述時益州置牧蜀郡置守則在先主時刺史治太
城太守治少城則在東晉時益州總管府劍南節度使
則在唐開元前一路安撫使四路制置使則在宋南渡
後

成都縣

秦司馬錯張儀滅蜀置釋同郡華陽國志云縣有十二
鄉五部

華陽縣

禹貢華陽黑水惟梁州梁彊梁也西方金氣彊梁之義
周有天下併梁於雍二州俱以華山為主雍之有華陰
猶蜀之有華陽也唐初為蜀縣析成都置乾元中易今
名

郫縣

杜宇名蒲卑都於此邑冢至今存秦因以卑名邑也唐
垂拱初割成都之西鄙置犀浦縣取李冰所剏石犀為
名宋熙寧中廢為鎮今為鋪在郫縣東二十五里

闕

稱益州牧始此

新都縣

漢高六年與廣漢郡同置三都之一也亦曰新郫邑界有王稚子墓稚子郫人遂有斯目按後漢書注郫故城在今梓州郫縣西南而此曰新以別之又地理志汝南郡有新郫後漢改曰郫丘章帝徙宋公之處也韻書廣漢之郫千咨切汝南之郫先稽切

溫江縣

江水至此始溫也濯絲有色後魏時立矣漢曰湔氐道
隋曰萬春今縣之長春鄉是其故址

新繁縣

秦曰繁以界有繁江也謂之繁田蜀姜維徙涼州降胡
於繁遷其民於新縣故曰新繁

雙流縣

李善注文選江水出岷山分為二經成都東南故左思
曰帶二江之雙流也漢曰廣都即蜀三都之一隋避煬

帝諱改今名 廣都水驛在今華陽縣東南國朝隆慶初廢 志云蠶叢故都城距縣南十八里

崇慶州

管新津一縣

蜀州也三國志云益州之地仰給於蜀宋高宗大觀元年封蜀國公至紹興中乃陞為崇慶府元降為州國朝因之 漢曰江原以江水所由也有江源祠莽曰邛原以與臨邛近也濱文井江晉曰晉原以有晉原山也即鶴鳴山唐曰唐安以獲安唐室也近西巡時今唐安為

驛而江原為鎮矣

新津縣

李膺益州記云皂里江津之所曰新津市周地圖記云
閔帝元年於此立新津縣也

彭縣

周彭國也武王伐紂彭人與焉又云錢鏐之封邑矣華
陽國志則以兩山對闕有天彭之號也 梁天監中立
東益州以在益州之東益州記云彭號小郫土地肥良

比之郛邑也袁隲記云九峰高峙濛水濬發後周之九隴隋之濛州取諸此矣志云今縣西二十里之三郎鎮即九隴故址縣東二十里之濛陽鎮即濛州故址

崇寧縣

析郛導江九隴三縣所置也唐曰唐昌宋曰永昌道君崇寧初改為崇寧

灌縣

李冰傳江水堰流以灌平陸謂之灌口貞觀曰灌寧孟

蜀曰灌州也 上古為魚鳧氏之國今有魚鳧故城

三國曰都安水經注云即都安堰也諸葛亮北伐以此
堰農大國之所資發征丁千二百人主護之有堰官宋
勅永康軍兼管堰事國朝尤慎重焉冬閉時修春開時
祀水利道主其事間行別駕及灌令代 齊曰齊基曰
青城唐曰盤龍曰導江宋曰永安軍又改永康軍 青
城山杜光庭記云岷山連峰接岫千里不絕青城乃第
一峰也 盤龍山益州記云山土色黃盤迴有龍形

導江水經注云岷山徼外江水之所導也 永安軍寨
宇記云宋初沿貞觀鎮靜軍之號也 志云青城廢縣
在治南六十里盤龍廢縣即治內導江廢縣在治東二
十里今為導江鋪永康廢址今為永康驛

威州 管保縣一縣

蜀後主時姜維馬忠等討汶川叛羌此其地也自晉以
後羌夷叛服不常以其地置薛城戍唐初白狗羌首領
鄧賢仇內附乃於姜維故城置維州以統之後改為維

川郡焉王孟二蜀繼有其地徙就中州城即今治也宋平蜀後以京逋發維州誤至維州因改曰威州取威制西羌之意維威音亦相近云 廢通化縣唐咸亨二年刺史董弁招慰生羌於此置小封縣在西蕃通鶴軍垂拱二年城為北蕃所沒改置在威戎軍西本志云在州之通化里與金川演化禪師相近

保縣

唐天寶中置天保郡乾元中改保州孟蜀復改保寧縣

也國朝洪武十八年去寧字以避保寧府

茂州

管汶川一縣

禹貢岷山導江發迹於此水經注云岷山即瀆山也水曰瀆水矣冉駹氏之國按白馬黑面曰駹駹夷名也史記南越破後冉駹等皆震恐請臣置吏漢武帝元鼎六年以冉駹為汶山郡汶當作沒古字汶岷通用王羲之游目汶嶺是也按地里表云汶山在茂州汶山縣岷山在西北如此則汶岷乃二山梁曰繩州普通三年置桃

關之路以繩為橋因作州稱隋曰會州謂其為西夷之
交會也唐貞觀始改茂州以茂濕山為名言山之草木
叢茂雲霧潤濕矣

汶川縣

漢之綿虎縣也虎有角曰虎行水中地有此獸矣晉置
汶川州於此周武帝保定四年移汶川州於廣陽縣州
廢乃置汶川縣

簡州

蜀漢簡雍為先主鎮牛鞞牛鞞漢縣名牛鞞之水出馬山曰賴簡池曰簡池皆民懷雍政也隋始於此置簡州矣西魏之陽安以山名今為驛隋之平泉以泉名今為鎮驛在治前鎮距西南五十里

資縣

陳留風俗傳及姓纂云資姓黃帝後在益州資中今邑之山川皆曰資從賜姓也寰宇記云廢銀山縣在資州東南三十八里以山名龍水縣在龍龜溪之左以水

名志云今之銀山鎮龍水鄉是也

資陽縣

邑當資水之陽齊建元間置又曾於此縣立資州矣
通志云盤石廢縣在縣北三里有石狀如盤陀月山廢
縣在縣境宋析入者有山形如明月

內江縣

本中江也與外江別入瀘州合流縣為後周所置隋室
之先諱忠改曰內江周以前曰漢安戍宋別名安夷軍

按今中江縣之水本內水蜀志先主從內水入涪是也而內江縣之水本中水以在內外水之中也沈約宋書云資江為中水涪江為內水恐因縣名而反混水名故特表之

仁壽縣

西魏之隆山郡也即鼎鼻山其山隆起又曰隆山矣周閔帝元年於此置陵州蓋因張陵而名陵井又因陵井而名陵州也陵置縣曰仁壽從文帝年號廢貴平縣

後魏恭帝與平井可曇二縣同立以隸和仁郡也今之貴平鎮入簡州界廢籍縣梁天監置席郡隋廢郡為縣後訛席為籍也今籍縣址入雙流界廢陵井監宋大觀四年改為仙井俱併入當縣

井研縣

隋置古之善計者曰研計然亦名計研也此邑鹽井之利出於心計乃以研系井而為名與寰宇記云有山俯臨井鑊名曰井鑊山方言關東呼鑊為鹵研 魏之蒲

亭隋之始建皆在缺山界上周地圖云蒲亭縣有缺山諸葛亮取為刀器因封宇文度為缺山侯即此

金堂縣

西魏置金淵縣唐避諱改金水咸亨中析立今縣曰堂者地寬平處也漢之牛鞞縣地宋併懷安軍入焉又名懷口今為懷口巡檢司去縣東南五十里古縣附金沙水舊屬簡池今縣連金臺山舊屬新都

漢州

管什邡德陽綿竹三縣

漢高帝六年置廣漢郡於乘鄉一名繩鄉廣大也言能
廣大漢業也東漢益州刺史治唐初立漢州天寶中於
此立德陽郡 華陽國志郡治雒縣以洛水所會也源
出洛通山矣元至正中省廢址在州北三里 寰宇記
潯陽故城漢陽廢城俱在城南

什邡縣

漢雍齒封邑年表作汁邠土地譜云廣漢領縣十以應
十幹縣當酉位酉十數也古碑邠水流為十故名什邠

今雒江出關口東枝六西枝四而縣居其中矣後周改
方亭縣今為里

德陽縣

漢曰德陽以德水之陽也晉曰旌陽以旌水之陽也孝
德旌異皆因姜士游士游綿竹人當縣後漢析綿竹所
置綿竹故城在治北三十五里諸葛瞻戰敗處

綿竹縣

漢縣也劉焉徙益州治於此地里志云紫嵒山綿竹所

出後周改孝水以姜詩宅在沅鄉為名至隋仍舊 沅鄉一曰沅鄉何武封邑

綿州 管彰明羅江二縣

左綿也地居綿江之左漢為涪縣以涪水所經矣曰巴中即巴西也曰潼州即金山也曰鹽泉即魏城也今名隋改 州治內有金山驛治東五里有巴西渡東北六十里有魏城巡檢司

彰明縣

後魏之昌隆縣唐避諱改昌明後唐改曰彰明矣李太白之所生也

羅江縣

左水自安縣來右水自綿州來合於縣之東北感成羅紋又謂之紋江也唐天寶置 晉初曰萬安李膺記云 晉於梓潼水尾萬安故城置萬安縣是矣今為驛 晉末亂移就潺亭水經注云潺山石下有泉曰潺水今縣北三里有潺亭廟碑磨滅潺亭字見存

安縣

唐武德置以界有龍安山云元為安州國初為安縣即隋之神泉縣也郡國志云縣三十里有泉十四穴甘香異常飲之已痼疾故曰神泉唐永淳年復置西昌縣取西昌山為名矣今縣三十里有西昌市南五十里有神泉廢縣址

龍安府

管三縣

西漢北部都尉治東漢之陰平郡也水經注曰岷山之

西有龍冢按梁普通中武陵王蕭紀僭據土人李龍遷保此番漢德之西魏平蜀始置龍州保其名矣向為龍門州郡元稹為龍州宣慰司國朝嘉靖四十五年改流系以安字

平武縣

晉於陰平郡置陰平平廣二縣隋改龍州為平武郡也與龍州改流之年並設

江油縣

以江水所由也後加水旁矣蜀漢馬邈守江油即此初屬保寧嘉靖末改屬本府

石泉縣

汶山郡之石紐村禹所生也漢廣柔縣矣城北岩下有甘泉乃石泉軍之始初隸成都嘉靖末改屬本府

青川所

有青川溪源出番界又啼胡山水出清美謂之清水也天寶中置清川縣於此國朝洪武四年置所在龍安府

東百二十里隸焉

松潘衛

地出甘松後魏以之名縣矣唐改松州潘吐蕃姓也洪武初設松州潘州二衛尋合為一置軍民指揮使司

唐天寶為交川郡後周為龍涸郡水經注云自白馬嶺回行二千餘里至龍涸是也

小河所

涪江支河也古曰涪陽國朝宣德四年置在松潘衛東

百九十里隸焉

疊溪所

氏羌之地漢蠶陵縣後周置翼斜郡唐曰翼州以夷水
遶其地分流如翼也國朝洪武十一年置取圖經疊石
為巢置所

蜀中廣記卷五十一

欽定四庫全書

蜀中廣記卷五十二

明 曹學佺 撰

蜀郡縣古今通釋第二

上川南道屬

嘉定州

直隸管六縣

漢犍為郡之南安縣地也治青衣江會應劭注漢書曰順帝改青衣縣為漢嘉以公孫述稱帝青衣人不賓光

武嘉之也後魏於此立眉州尋改青州益取峨眉青衣水之義矣宇文改嘉州也宋寧宗潛邸陞嘉定府今仍其名爲州 案宇記云嘉州治龍游縣隋開皇初伐陳有龍見江水引軍故名又云州治對江四十里有平羌縣本漢平羌戍也周保定置縣 今州之遞運所是龍游縣址平羌驛是平羌縣址青衣舖是青衣縣址

峨眉縣

兩山相對狀如峨眉後周所置也青衣平羌舊理此

隋之綏山唐之羅目二縣入焉縣西四十里即綏山址
葛由賣木羊處也縣南三十里即羅目址本羅蒙山訛為
羅目也今之木羊鎮羅目街是

洪雅縣

界有洪雅川源出離堆離即雅也後周立洪雅鎮隋改
為縣或謂葛洪寓居縣之花溪上昇故名

夾江縣

隋於夾江戍置縣益分龍游平羌之地亦曰涇上志引

山海經云夾水出於其陰也 漢為南安縣今之南安鄉是史記年表宣虎以破臧荼功食邑於此

犍為縣

漢武置犍為郡治犍今之馬湖平夷司是保乾圖曰犍有乾山形如牛後周於沉犀山下置沉犀郡隋於大鹿山下置犍為縣志古也玉篇曰犍似豹人首一目為即猴大篆為作兩猴 隋之玉津唐之應靈入焉縣治上流即壁玉津也界大牢鎮即古應靈也

榮縣

周十亂榮公之采地其後夷公之墓在焉又曰古有榮
隱先生居此唐置榮州治旭川縣榮旭之義通矣宋光
宗潛邸陞為紹熙府今復縣名榮也 志云縣南八十
里有公井故城即唐之公井縣址縣西八十里有缺山
即晉之資官縣址皆併當縣

威遠縣

隋於威遠戍置縣取威撫遠人之義國初省入榮後復

割榮之益昌鄉以益之

眉州 直隸管三縣

地在峨眉山陰以之名州自西魏始實治嘉州若梁之齊通郡隋之通義郡唐之別置眉州則今理矣宋時陞為防禦使治眉山蘇子瞻所謂眉州眉山共一城者也晉置西江陽郡子由詩子生雖江陽指此

彭山縣

秦之武陽梁之靈石也漢昭帝已後及晉宋犍為郡皆

理於此隋曰隆山縣屬陵州唐貞觀中以縣屬眉因界之彭女山為名又曰取彭亡山岑彭所惡也隆彭皆高大之稱義或本此

青神縣

本南安縣地後周置今縣以青衣江所注也蠶叢衣青而教蠶事蜀人神之故曰青神又曰水濯衣即青

丹稜縣

齊之齊樂郡也後周洪雅縣地隋析出為丹稜取多稜

川之名矣寰宇記多稜川有獠居焉即此

邛州

直隸管二縣

漢臨邛地以臨乎邛岷矣 廢火井縣隋大業置博物志云臨邛火井諸葛亮觀之轉盛是也廢依政縣後魏時置寰宇記云即秦之蒲陽縣也 今州南二十五里有火井壩巡檢司州東七十里有依政縣故址

蒲江縣

漢宣帝地節中穿蒲江鹽井增鹽鐵官西魏始置縣又

立蒲陽郡以統之今縣南八十步湧泉方丈蒲草生焉
古蒲頓也

大邑縣

寰宇記唐咸亨中分益州之晉原縣置其壤廣大因以
為名 有霧中山是號霧邑

雅州 直隸管三縣

取雅安山為名李冰所鑿離堆在其地也離音雅坤元
錄郡國志通鑑釋文皆言之秦滅楚遷嚴王之族於此

曰嚴道矣西魏置蒙山郡隋改今名

名山縣

漢青衣嚴道二縣界西魏始置縣謂之蒙山域中有蔡蒙也隋以二山著名禹貢改蒙曰名終唐世皆曰漢源宋乃仍舊今縣東北七十里之百丈驛則唐百丈縣馬圖經云山有一穴口圓百尺深百丈漢王陽所畏道也

榮經縣

唐武德初始置縣於榮經水口戍榮經二水名也乾符中曾改為金湯軍宋初復舊

蘆山縣

漢之靈關道也界有蘆奴山於衆山特小隋煬帝始以名縣國初加草字以山出葭蘆矣

黎州安撫司

漢誅苻侯於苻都立沉黎郡以水沉黑名也後周與宋皆曰黎州元始外為土司國朝因之增置大渡河千戶

所漢旄牛都尉隋登州及漢源縣皆置於此

天全六番招討司

蠻獠之墟三代為氏羌西魏始陽縣地也在唐羈縻屬雅州都督五代土人高曩閣藏等歸附置碉門黎雅長河西魚通寧遠六安撫司元於碉門置六番小溪置天全二招討國初合而為一所轄部落有馬蘇金楊隴東西碉六村謂之六番高姓世招討使楊姓副之

建昌道屬

建昌衛

漢越雋郡隋唐之雋州也咸通中蒙氏設建昌府元置
路國初改府尋廢為衛仍設行都司以統之領禮州昌
州等千戶所及長官司

禮州所

在建昌北六十里漢蘇示縣也隋曰蘇祇唐曰蘇祁元
曰禮州國初置後中二所吐蕃號為龍麼城

德昌所

在建昌南六十里漢邛都縣地元置德昌路國初改府
尋廢宋時號阿屈部

打中河中前二所

在建昌西百四十里亦邛都地唐曰沙野城元為瀘州
地河源出吐蕃下流合金沙江一名黑惠又名納夷

昌州司

在建昌南二百里蠻名阿屈部元始置州國初棄為長
官司

威龍司

在建昌東南四百十里夷名巴翠部元始置州洪武中
棄為長官司

普濟司

在建昌西南二百四十里夷名圩甸元始置州洪武中
棄為長官司

越雋衛

漢郡名卽都國聞縣治也應劭注漢書界有雋水謂越

此水置郡以章休盛也元為邛部州國初立衛廢為長官司矣衛在建昌北二百八十里司在衛東

寧番衛

在建昌北百九十里邛都國地也元為蘇州亦取蘇示之名國初因之為衛後以地當諸番之衝改易今名領冕山橋千戶所在衛東百二十五里山在橋東狀如冠冕

會川衛

在建昌東南五百里漢會無縣唐會同府也蒙氏呼會
川邏若漢語安樂城然國初立府領武安永昌麻龍等
州縣麻龍又曰麻泥若漢語黃土城也尋改為衛領迷
易千戶所在衛西八十里

鹽井衛

元置閏鹽縣有黑白鹽井矣國初因之又於此立栢興
州尋改今名在建昌西三百里漢之定祚縣也蒙氏為
香城郡宋時名賀頭甸元初為落蘭部領打冲河所及

馬刺長官司在衛南五百里

下川南道屬

叙州府

古夔國所謂夔道縣也西漢犍為郡理梁命先鐵定夷
獠於此乃立戎州宋徽宗政和中改今名取西戎即叙
之義按西漢犍為理此元光已後始移武陽

宜賓縣

唐之義賓縣也取其慕義來賓矣宋政和年改義為宜

後周曰外江以水名蜀漢曰郫郫以山名

慶符縣

界有集慶迎祥二山宋政和中與祥州同置實唐之撫夷縣也寰宇記曰石門路即隋史萬歲南征道志云宋有來附縣亦與當縣同置者今來復鋪是

富順縣

漢江陽縣地有鹽井之利後周立富世縣唐避諱改富義矣宋廢縣立監始改今名亦諱也治平中復為縣元

時為安撫又為州

南溪縣

漢晉南廣縣以拓地於夷也梁立六同郡言六合所同矣後周曰南武隋曰龍源皆稱戎仁壽中始改今名益地居焚溪之南云 龍源戎今龍騰驛是

長寧縣

輿地紀勝曰漢陽縣今長寧軍也按漢書漢陽縣犍為都尉治所益夷徼云唐置州曰長寧宋改為軍立武寧

縣隸之其曰鹽泉縣曰涪州曰涪井監皆以鹽名漢陽者謂自漢武南征此縣之南皆漢地矣

高縣

古夜郎地唐之高州也界有宋水即宋州矣高宋舊皆羈縻州

筠連縣

漢定川寨唐之符連二州也元合為一隸永寧路天后時拓邊又置定州供輸紫竹縣以此名

珙縣

西南夷部羅計羅星地也唐為羈縻薩鞏二州鞏音近珙故名或曰珙玄玉也有石似之

興文縣

西南夷部界有晏山唐儀鳳中拓地以為州名元立大壩府繼陞戎州國初之戎縣也萬厯元年平九絲改今名取偃武修文之意

隆昌縣

古昌州地也隆慶改元置理隆橋驛二義兼取矣

建武千戶所

在宋為九絲山都掌地國初隸戎縣萬厯元年討平以其山都六鄉置所對興文也城曰武寧

馬湖府

管屏山一縣四長官司

漢牂牁郡地也界有龍湖中潛龍馬晉以之名縣矣唐始置羈縻四州於此曰馴騁浪瀉元立馬湖土府國初因之弘治八年改流

屏山縣

萬厯十七年置於附郭取寶屏山為名

泥溪長官司

唐長慶中縣名也界有此溪

平夷長官司

漢之平夷縣也其半為鬯縣地晉曰平夷郡

蠻夷長官司

至元初宣撫司之名後以宣撫為馬湖路仍立今司

沐川長官司

唐高駢平沐川寨築城於此故址尚存

瀘州

直隸管三縣

江受瀘水也州在梁時治馬湖江口故遙取之宋淳祐
中余玠徙治神臂山元徙今理在江之南 漢曰江陽
有江陽祠唐曰瀘川即瀘川驛

納溪縣

瀘川縣地宋初於納谿口置軍寨唐羈縻有納州以納

水所自出也置縣始在紹定中元移治江北

合江縣

漢符縣東漢符節縣地也梁稱安樂戍後周取合符之義始置縣安樂戍故址在縣東五里安樂山

江安縣

本江陽地晉平漢安獠置縣於此曰漢安矣隋取二義而改今名廢綿水縣在綿水溪口今為綿水鄉

瀘州衛

國初調長安衛官軍征滇回駐守州治成化初山水都掌亂遷於宋江渡水源出夷界宋州

永寧宜撫司

介江安合江二縣境古蠻夷地也漢屬益州郡晉始置永寧縣屬雲南郡唐元和初立祖叱來彌為酋長改縣曰蘭州宋廢州移治於魚漕溪口稱永寧路元改今司領筠連州騰川縣國初割筠連入叙府騰川廢為司地領太平九姓二長官司

鎮雄府

古號屈流大雄甸芒部所居宋始置都大巡檢司名西南番部元稱芒部路隸雲南國朝仍舊名為軍民府嘉靖初土官隴政兄弟爭立改流易名夷語謂涼為雄石為砮鹿為砌界有砮砌雄山謂山石類鹿而高聳清涼也今仍為土府而印文無土字

東川軍民府

古東川甸也烏蠻居之南詔蒙世隆始置東川郡元改

萬戶府國初牟仲由之裔祿設姑歸附改今官楊用修
引樊綽雲南記云界有蒙樂山出比翼鳥即蔡蒙旅平
之蒙山也未詳

烏蒙軍民府

古竇地甸漢牂柯郡地也唐時烏蠻阿統居此其裔名
烏蒙者部落強大號烏蒙部宋世封烏蒙王元為路隸
雲南本朝改軍民府土官祿姓夷語謂首為烏

烏撒軍民府

古名的巴甸烏蠻居之宋時其裔有析怒者拓地自強
部號烏撒元季置招討司尋改軍民總管府復改宣慰
司以烏蒙東川芒部隸焉國初改軍民府隸雲南洪武
六年後改隸本省

蜀中廣記卷五十二